

Rebibando e temponan aya

Celebracion fantastico cu aubade y desfile dilanti Bestuurskantoor



Den oranan di mainta di 18 di maart e celebracionnan a cuminsa dilanti di Bestuurskantoor. Tabatin desfile di varios grupo di deporte, social, cultural, paramedico y otro den nos comunidad. Gobierno di Mike Eman a trece bek e tradicion di "aubade" cu a bay den olvido pa hopi aña. Bou direccion di sra. Maybeline Arends-Croes, nos hobennan a bria cu nan cancionnan bunita. Invitadonan di exterior a wordo brinda e oportunidad pa hiba un discurso.

Gezaghebber di Bonaire, drs. Glenn Thode, kende tin lazonan familiar cu Aruba y pa hopi aña tabata Rector na Universidad di Aruba, a bin bek riba e simbolonan den su discurso.

"E bandera ta bula den e biento, esaki ta algo fisico, pero tambe ora cu e biento no tey, e bandera mester keda bula den nos curason." El a felicita Aruba cu tur loke nos a logra y a bisa di ta spera cu otro partinan Caribense di Reino lo sigui e ehempel di Aruba. Minister Presidente di Corsou, Gerrit Schotte tabata positivo pa loke t'e plannan cu tin p'e relacionnan den Reino. "Nos mester stop di discuti so riba problema, pero nos mester amplia e posibilidadnan di cooperacion. Nos mester fortifica otro". El a haci un yamada riba e



gubernantenan pa nan ta conciente di nan responsabilidad pa logra e mihor pa nan pueblo. E Minister Hulandes di Asuntonan Interior y Relacionnan di Reino, Piet Hein Donner, a tira un bista den pasado pa acentua con excepcional ta loke 25 aña pasa a wordo realisa. "Nos mester keda tin respet p'e hendenan cu a percura p'esaki. Ta demasiado facil pa considera logronan como algo normal sin mas." Donner a manifesta cu Aruba e temponan aya tabata e pais mas hoben den e parti Caribense den Reino, y cu awor e t'esun mas bieu. "E bieunan tin cu yuda e hobennan. Nos tin cu keda sostene otro pa keda hunto ya cu cay for di otro ta facil. Keda hunto, esey ta un arte." El a acentua cu Aruba ta riba e bon caminda pa duna contenido y balor adicional na Reino Hulandes. "Aruba a haci e escogencia pa mantene union den Reino. Un escogencia tuma den libertad pa keda hunto, sin perde loke ta di Aruba. Aruba por ta orguyoso riba esey".

